

LĚTO 2017 W SERBACH

Reformacija a nowy koncept

Jubilejne lěto reformacije w Sakskej pod hesłom „My smy tak swobodni“ zahajichu z ekumeniskej swjatočnej Božej službu 7. januara w ewangelskim džělu Budyskeje cyrkwe swj. Pětra. Krajny biskop Ewangelsko-lutherskeje krajneje cyrkwe dr. Carsten Rentzing a Drježdžansko-Mišnjanski biskop Heinrich Timmerevers swjećeštaj kemše. Wjetši serbski podžěl swjatočnosće bě Serbske ewangelske towarstwo nastorčilo.

19 wosobow z nimale wšěch kónčin dwurěčneje Łužicy je iniciatiwa Serbski sejm 28. januara we Wojerowskim hrodze do Rady starostow powolała.

Ptači kwas kaž tež póstnicy wopokazachu so jako runje tak woblubowanej nałožkaj kaž hižo w minjenych lětach. Serbski ludowy ansambl swjećeše ze swojim programom samo „dejmantny kwas“ – mjeztym 60 lět wuměłcy SLA přihladowarjow po cyłej Łužicy zawjeseleja.

Loni dopokaza wulki zajim wopytowarjow jutrownych wikow w Budyšinje, Slepom a Wojerecach, zo so přewšo čile přestowany nałožk debjenja jejkow džen a bóle z našim regionom zwjazuje a zo potencial zwičnjenja hišće dowučerpany njeje – hač na dobro tohole ludoweho wumělstwa, je druhe prašenje.

Swój změneny koncept za Łužiski rewěr je energijowe předewzaće LEAG w měrcu předstajilo. Wolóženje to za mnohich wobydlerjow Slepjanskeje kónčiny, dokelž nima so tam nimo Miłoraza žana dalša wjes brunicy dla wotbagrować.

Hłowna a wólbna zhromadźizna Domowiny wobkrući Dawida Statnika jako předsydu třěšneho zwjazka Łužiskich Serbow. Dalše, snano samo kontrowersne temy so jeničce snadnje jewjachu. Tole bě iniciatiwje Serbski sejm z dalšej přičinu, na kmanosći Domowiny jako jeničkeje zastupjerki zajimow Serbow dwělować. ■ **Bosćan Nawka**